

10 Jahre CSS

Isch chum zum gloube u doch wahr,

Mir fiire bereits üses z'10te Jahr!

Aber wüsset dir eigentlech wie dä Verein entstange isch?

Ned? Ig verzeue öich itz wie das gange isch.

Es het nämlech z'ersch es paar Zufäu gä

bis d'Giele schlussändlech am 5.Juli im Piwi dr Startschuss hei chönne gä.

Dr Svenu het ire Migros büglet z'Bärn,

u isch äbe denn scho gsy e Chelsea-Fan.

u mängisch, wenn är so isch im Lade umegloufe,

isch eine mitenem Chelsea-Rucksäckli cho iichoufe.

Eines Tages het du dr Svenu aue Muet zämegno,

u so sy dr Brünu u är itz erschte Gschpräch zäme cho

Dr Jürä hingäge isch mau mitem Röschu ufem glyche Zügli gsy,

ig gloube, o da isch z'stouz präsenierte CFC-Logo Grund fürnes ahgregts Gsprächli gsy.

Für mi isch denn Chelsea eifach e schöne Name gsy,

bis dr Svenu mau bimene London-Trip heit gmeint so e Bsuech ar Stamford Bridge müesst de scho fasch sy.

U so hei mir de e Parkwächter bestoche,

u hei z'erscht mau für öppe 2 Minute chly, chly Stamford Bridge Luft groche.

Dr Svenu isch de mau, ufbroche sy sie ir Nacht vom Mattefescht, mitem Brünu u Säschu a sy erscht Chelsea Match.

Auso: u so het äbe z'einte z'angere gä,
u mir sy äbe wie gseit im Piwi zäme eis ga näh.
Dr Jürä het scho grad mau gseit wo's düregeit
Chelsea Supporters Switzerland nenne mir üs het är gmeint.
Är machi o grad dr Kassier het är anerbote, u wär das ned langsam
gnue ufe nüchtern Mage,
het är eim no grad *60 Stutz Mitgliederbiitrag müesst de scho sy um*
d'Ohre gschlage.

Ig für mi ha mir dänkt: läck was isch de das für eine?
dä füehrt sech ja uf, me chönnt o meine!
Aber geit mi ja nüt ah die ganzi Sach,
d'Giele hei iffrig gnickt u so het me's de nach Jürä's Vorschleg
gmacht.

U so isch das Vereinli vo Brünu, Jürä, Röschu, Säschu u Svenu
gründet worde.
Gfunge het sech da ganz e ungerschiedlechi Horde.
D'Ämtli sy verteilt gsy, ah aues hei sie dänkt,
u so hei sie die erschte Schritte i d'Bahne glänkt.
Es paar Tag später, ig ha nüt Böses gahnet,
bi mitem Svenu fürne Uswärtsmatch am HB umeghanet,
chunnt dr Brünu, ha gmeint är chöm cho Sälü säge aber da seit är:
Du, mir hei gmerkt, dass e Sekretärin gar ned
mau so z'Dümmzsche wär...
Tja, u so bini haut de o no zur dere Truppe cho,
u vouer Elan hei mir aui die Sach i Ahgriff gno.
D'Homepage isch gebore worde
u mir hei flissig für Members gworbe.
gly, gly het's die erschi Ahmäudig inegschneit
sy Name isch Amacher Bide het mir das Mail denn gseit.

U so isches stetig vorwärts gange,
uf üsi legendäre Feschтли het me immer planget.
I dene 10 Jahr hei mir vii gmacht aber o vii glehrt,
u übrigens: O ig ha relativ schnäu mau gmerkt,
dass dr Jürä scho rächt isch, eine isch wo zieht,
immer da isch ou wenn's mau brönnt u pressiert.

I dene 10 Jahr hei mir vii Gfröit's erläbt u gseh,
mau chly weniger u mau chly meh.
X-Mau het me e Flug nach London *müesse* näh,
aber o Niederlagene het's natürlech .z'verschafte gä
Oft het e Hürde üs erwartet,
Aber zum Glück het hinge de Wueche immer wider z'Sünneli gwartet

Ig ha öich ja scho verzeut vo Svenus erschem Londontrip,
u am Jutzi Brünü gib ig hie u itz a Tipp:
Immer, wüchli immer wenn mitem Svenu ir Subway bisch
het dr Svenu es Blaseentläärigs-Bedürfnis.
Blöd, isch wenn dr Säschi o no seit är müessi itz,
dr Brünü het gmeint: „tammi no mau es geit itz no e Bitz!“
U so het me müesse bir nächschte Station usegah,
damit die zwe ihres Bisi hei chönne lagah.
Z'Problem isch, chasch ja im Pub ned eifach nume Toilette bruuche,
u so hei dr Säschi u dr Svenu no d'Theke müesse bsueche.
Dr Brünü het dusse gwartet, die zwe hei dinn eis gsoffe,
u statt dass dr Brünü ou ine wär, isch är d'Strass ungeduldig ufe und
abe, ufe und abe gloffe

Oder dr Töbu: Dr Töbu het's gärn chly luxeriös,
drum sy üsi Londontrips für ihn aube ned eso generös.
Syni Befürchtige hei sech du mau bewahrheitet,
z'müehsam buchete Bettli im Hotel het ihm gar ke Fröid bereitet.
Dä schissig EasyJet Flug ändlech hinger sech bracht,
het's ihm fasch eine gä ab däm Schlafgemach.
Är isch de grad ine 5-Stärn Bunker züglet
me cha sech's ja leischte wenn me aus Bänkeler büglet...

Dr Schuldig für Töbu's: *Hie liege ig ned* Philosophie,
isch ir Person vom Michu schnäu mau gfunde gsy.
Mit sym beschte Gwüsse, mit Müeh u Not
het är derfür gsorget dass d'Giele überhoup es Näscht hei vor Ort.
Nume sy d'Giger in London ziemlech tüür,
dr Michu het ufne guete Priss gluegt u cha ja nüt derfür,
dass die Föteli im Internet viu versprächend hei glockt,
Tja, die Buechig, die het dr Michu verbockt.

Mit dere Gschicht het itz o dr Michu sy Taupe im Vorstands-
Pflichteheft,
gscheh nüt Böers, ghört derzue das zwüschine mau chleft.
Aber süsch isch dr Michu ganz e guete Siech,
mir wüsste ned was mir ohni ihn im Vorstand miech.
Isch immer ruhig o bi schwierige Debatte,
het so scho mängisch chönne dr Ball flach bhaute.

Wenn dr Säschu in London isch, de isches Pflicht
ufne Bsuech ir Carnaby Street isch är ganz epicht.
Im Merc wott är aube z'Gäud loswärde,
es sy immer schwäri Entscheidige i sym liebschte Shop uf Ärde.
Soo viu Schöns gub's dert zum choufe,

aber me cha ja ned jede Tag i däm Label umeloufe.
U so cha das Shoppe stunde ga,
bis de sys Porte-Monnaie seit: *au! Pfüngli tüe mi verlah.*
Im letschte Winter het dr Jürä wider mau es Risse gha,
ou är het wider mau richtig Stamfordd Bridge wöue ga.
Är het no grad d'Ittigergiele wöue i Chelsea-Wäut iiführe,
auso: Bueche! me het ja nüt z'verlüre.
Isch haut eifach dumm, dass d'Insulahner Massene a Schnee
ned so kenne,
EasyJet Flug storniert, Jürä secklet itz Reisebüro u seit: „*Nei! Mis
Problem isch ned z'penne.*“
E Flug muessi ha, u so het är umbuechet uf d'BA.
Tja, dr Flughafe Heathrow isch o e Tag später versoffe i däm cheibe
Schnee,
gfloge isch dr Jürä definitv de ned.
Het dä Match haut im Piwi gluegt in Bärn,
derbii wär är doch so gärn,
wider mau am Match ar Bridge, i däm schöne Stadion
und tja, es tönt wie e Hohn:
Z'Tröschтели, die nächshti Reis haut de im Februar
isch o itz Wasser gheit, isch ja klar.
Chelsea het dä Match verschobe,
u so het dr Jürä syner Plän haut no mau gschobe.

Das sy so es paar Gschichtli rund um Londontrips u miner Giele,
wo sie haut scho gärn umestriele.
Natürlech gub's no viu meh z'verzeue vo üsere Chelsea Horde,
viu hei ghürate u für Vereinsnachwuchs isch oft gsorget worde.

Hoffe, dir heit no ned dr Verdruss,
Aber wie seit me so schön: Z'Beschte chunnt zum Schluss:
Ohni öich tröie Mitglieder würde mir hüt ned zäme fiire,
ohni öich würde mir ja gar ned so lang existiere.
Es würdi z'wiit führe au die Näme ufzeue,
die wo's betrifft wüsses scho, Merci dass mir syt 10 Jahr dörfe uf öich
zeue!
Merci, dass dir immer syt zu üs gschtange, sygs bi Sunne aber ou
wenn's het gschiffet,
u üs so mängisch het ghufe Klippene z'umschiffe.
Mit dene Wort tue ich öich itz entlah, itz wird wiiter gfiiret u mir
stosse zäme ah,
uf die nächschte 10 Chelsea Supporters Switzerland Jahr!

